

JOEL

Jawen unanmati janchaki

Diosun jancha yuixunika Joelin na una kenekin Judán enabu axunkinan, 800 año Jesucristo judiamatian anikiaki. Jatun chakabu jenetan shinan betsa watan jau Diosun jancha ninkakubainunbun jatu yusinikiaki. Ja inun, nawa xukuabu tibi jiwebaunabu Diosun jawen Yushin jatu inanxanaikididi keneniki.

Mibán shinín chakabu wakin yamawaxanikiaki, na janchadan

1 ¹Petuelin juni bake en Joel na kaka Jehován ea jatu yusinmaniki.

- ² Anibu unanepabu inun nukun mai pakea anu man dasibi
jiwebaunabuun,
na jancha en matu yuiai ninka peidawakanwen.
Na chakabu jaska juai tenekin man memis keskama ma jayaki.
Jabias matun epabu inun matun xenipabun jaska ikai uianma
ipaunibuki.
- ³ Jaska en matu yuiai natian ikaidan,
matun bakebu dukun jatu yuikubainkanwen.
Januxun jabundi jatun bakebu jaska man tenekubaini
jau matukidi yuidiakubainxanunbunwen.
Januxun chipu jatun bakedi kaindiaibudi
jau jabias jatu yui jeneyamanunbadinunbunwen.
- ⁴ Shini bexun yunu inun,
basi inun, miban shadabu pei pikin keyukin jenebainaibun
jatidi shini betsa ana bekin
ja texe wabainshinabu keyujaidakin ma yamawashinabuki.
- ⁵ Man paenawanbuun, bestentan uinkanwen.
Uva bimi jene ma pema pema akaibu
matu mebinxanaibuwen taea
vino anikabuun, kaxadikanwen.

- ⁶ Detenamenikabu kushipa midima keska
shiniwanan, inu betsa león bene xeta keska inun
león yuxan makushpia keskayatun
dasibi en mai pakea jidabi ma achi keyuabuki.
- ⁷ Nukun uva bai nishi chakabuwakin keyukin
nukun miban ji higuera senu senu akin
jawen pei inun jawen bichi dashpikin
jawen mebi metax wakin
juxu datanbainshinabuki.
- ⁸ Jamen betsadan, beneyakatsi jabe yubakaima ma mawaken
nui tadi bexa sawea bis bis iki
kaxakunkaini keskai
- ⁹ en kenwanti jiwe Templo anuxun Jehová kenwankin
inankuinti xekiwan trigo dudu inun
uva vino ana jayamawen taea
nukunabu Diosbe nuku janchaxunikabu ma kaxakubainkanikiki.
- ¹⁰ Yunu bai dasibi jawa jayama xaba besti dakaki,
mai besti pes daka kaxai keskadan.
Xekiwan trigo shiniwanen pikin ma keyukin benuabuki.
Uva nishi bana ma xanai keyuaki,
jawa betsa taska bexeamadan.
Olivo ji pei dasibi ma pashin keyua dakadiaki.
- ¹¹ Man dayakapa bai anu dayanikabuun,
matun uva bana inun matun xekiwan trigo inun cebada bai anu
man banamis matun miban dasibi
ma benui keyuken
man jania ana tsekativawen taea
punu nuka kaxakubainkanwen.
- ¹² Uva nishi dasibi xanai keyua
higuera miban ji xanai jawen pei nidi iki keyui
jawen bimi ma benuaki.
Bimi batapa granado inun, banin inun,
bimi betsa manzana bai anua ji bimiya dasibi
ma xanai keyuawen taea
jaska keskadiai yuda dasibibun jatun benima pae
ma benukin keyudiabuki.
- ¹³ Matu man nukunabu Diosbe janchaxunikabuun,
Jehová kenwanti jiwe Templo anu dayakin
xeikiwan trigo dudu inun
uva vinowen nukun mekenika Dios
jawen chi tapu anuxun
man ana inankuintidubumaki.

Jaskawen taea matun tadi pepa pekatan
nui tadi bexa sawetan
nuichakayamai kaxadikubainkanwen.

- ¹⁴ Anibu unanepabu inun
nukun mai pakea anu jiwebaunabu jatu yuikanwen.
Nukun mekenika Dios Jehová kenwanti jiwe Templo jemaintin anu
ichatan
samakekin januxun medabe Jehová yukaxankanwen.
- ¹⁵ ¡Ma pemajaida juaya nun peidakanwan!
Jehován janu kupixanai ma kemaikiki.
Xaba mesejaidatian nuku dasibibu unanti wakin
kushipa dasibi binu keyuatun
jawen kupitiwen yamawabaunxanikiki.
- ¹⁶ Nukun bedubi nukun piti dasibi nuku mebiainbun
nukun mekenika Dios kenwanti Templo jemaintin anua
jawa benimati jayama ma keyukunkainikiki.
- ¹⁷ Mai xexakin kedanwanbainxun
ja xekiwan trigo jexe banakin sa abiabu
beneama mawai benui keyuaya
janu aduti dintu tibi di akin ma keyuabuki.
- ¹⁸ Jamen ina awan jatun basi benai maan maan ikaibun
jabiaskadiai chaxuwan xukuabu mawakubainkanikiki.
- ¹⁹ Jehováan, pemakin jui kushipawen min medabe en mia yukaii.
Janu tsua jiweabuma anua basi inun
nukun bai anua chiwen ji kuakin ma keyuabuki.
- ²⁰ Ja dikabi paxku ma netsui taxkai keyuken
chiwen jatun basi menui keyuken
yuinaka inabuman mia yukadiakanikiki,
jau min jatu medabewanunan.

Shinibube Jehová juxanikiaki, na janchadan

- 2** ¹⁻² Tsuanda Mati Sión anuxun trompeta mawakin chan chan akin
Jehován mati medibi anuxun
mese juaikidi jawen unanmati jatu banabimakanwen.
Jehován jatu kupiaitian
nai kuin meshupa inun nai kuin uta
xabatian meshua yamea dakaxanai
ma kemaiwen taea
Judán mai pakea anu jiwebaunabu dasibi datei saki saki
ixankanikiki.

Detenamenikabu kushipajaida midima mati matipa anu
bebidan bebidani
ma penai xabakidanai keska
dasibi nati ikabu uinxankanikaniki.

Jaskaibu uatian tsuan uianma inibu inun
ana jaska kaiaiun unudi ana uianma ixankanikaniki,
ana ja keska betsa taxniama ixanaidan.

³ Janua shini chi keska nukudiabuma
mai pepa anu miban jawendua dakaken
chi jede ji ji ikai keska
bekin dasibi kuakin achibainkin
binukaindiamda dasibi menui keyubainaya
janua ja chi ma binukainaya
jabias mai anu miban jawendua ibiaima
janu tsua ana jiweama yenken dakaxanikaniki,
jawa texe betsa jenebainamadan.

⁴ Ja shinin yudadan, caballo keskaki,
detenamei jaki katsaumebaini kushibidanaibu keskadan.

⁵ Mati matipa mamaki ja shini ishchu ishchu ibidanidan,
jawen jui kainmabidanaidan,
detenamei caballo jawen tadanbainti tadanmekainai jui keskabuki.
Tadux tadux ibidanaibu keska
nisa pei tsusin kua sakada sakada ibainai keskabuki.
Detenamenikabu midima unanjaidaibu
xukuabu tibi detenamekatsi
ma pejaida watan beaibu keskabuki.

⁶ Ja shini uin yudabu dasibi datei saki saki iki
besu juxua mapuabun

⁷ juni detenamenika mentsisipabu keska kushibidani
mae kenekauna janu inanun ika
niti ikama bui kekubaini jawa binui yushtuama

⁸ jawa betsa tu ikama
bestibu tibi jabias bai besti chibainbu
jatukidi pia midimajaida bishku bishku abiabu
jawa dateama ja xukubainaibu jawa pua iki paxkama

⁹ mae kenebaunibu anu ishchubainbaini inatan
butubaini jiwe tibi jikikain
yumetsubu jawa chaniamka keska
janu uinti xui anu jikibainkin
maewan jidabi achi keyuaibun

¹⁰ jaskaibun jatu bebunua mai saki saki iki

nai tadi tadi iki
 badi inun uxe ibubis meshui
 bishi mawaida ana chaxama

¹¹ jatu be bun kakin jawen jui tin ikainkainai keska
 jawen tsumabu Jehován jatu ninkamakubidani
 jawen yunuti jancha ninkakin axunkin menemisbu
 midimajaida tsuan tana keyutiduma ixankanikiki.
 Janua Jehován janu kupixanai xaba mesejaidatian
 jawen kushipa uinkin
 tsuan jawa nemakin bextetiduma ixanikiki.

Jehová nuikipa jatuwen dabanan ikanikiaki, na janchadan

¹² Januxun Jehován jawen jancha chanima mestenwankin eska matu
 yuikin:

“Samakei bis bis iki kaxakin
 matun juinti jidabiwen shinan betsa watan
 ea anu chintundikanwen”, matu waikiki.

¹³ Matun chakabu jenetan shinan betsa wakin
 matun Mekenika Dios Jehová anu chintuntan
 ja besti chibankin
 jawen jancha ikunwankubainkanwen.

Jehová nuikipa duapa jin jin isma
 unanxubida sinatakunkainmis
 bechipainamenikajaida matu kupikatsi ikamabia
 matu kupiduwen taexun
 nui bika tenekin matun tadi man ushnimis keska wakin
 matun juintinin man chakabumis uinmakin
 matun tadi ushnia keska wakanwen.

¹⁴ Man jaskaibun matu kupinun ixun shinanbiai
 ana jaska shinanma
 shinan betsa waxanimenkain.

Jaskatan nukun Mekenika Dios Jehová
 man ja tsekaxun inankuinun
 xekiwan trigo inun uva vino matu inantiduki,
 matu ana pepawen duawakinan.

¹⁵ Mati Sión anuxun trompeta chan chan akin
 nukunabu ichawaxun
 jatu banabimakanwen,
 jau samakenunbunan.

¹⁶ Diosun enabu dasibi ichawatan
 Diosun jau jatu ana dananyamanun

jatun chakabu tibi jatu jenemakin
 jatun juinti jatu xunpin wanmakanwen,
 anibubu inun, yuxabubu inun,
 juni ewabu inun, bedunanbu inun,
 chipashbu inun, bake mishtinbu inun,
 bakeishtan chuchu akaibu inun,
 dama ainyanbiasu jatun ainbe taxnibidanaibu
 dasibibu jatun ichawakinan.

¹⁷ Jehován kenwanti Templo jemaintin anu ichabu bebun nikain
 Diosbe nukunabu janchaxunikabu
 Jehová dayaxunmisbudan,
 ja medibi dintu beputi anu
 jawen kenwanti chi tapu namakis nia kaxakin
 eska jancha Jehová jau yuinunbunwen:
 “Jehováan, minabun chakabu tede atan ana shinanyamawe,
 jau ana tsuabuda minabuki kaxekubainyanamanunbunan.
 Minabu nawa betsabun jatuna wakin ibuwatan
 jau ana jatu yunuyamaxanunbunwen.
 Jabun ikunwanbuman mikidi jatuh yukakin:
 ¿Jania, matun Mekenika Diosdan? ikin
 jau ana jaska jatuh yuiyamakubainunbunwen”, ikaibun

¹⁸ jaska jancha yuiaibun jawenabuwen nuikin jawen mai pakea
 bechipaikin jatuh shinain uinmakin ¹⁹ Jehován jatuh ichakawama jatuh
 yuikin:

“Matun piti jau keyuyamanun
 xekiwan trigo inun, uva vino inun,
 piti xeni en matu yunukubainxanaii,
 ja pi man benimai pe pekubainxanunbunan.
 Ja dikabi ikunwanbuma
 jau matuki ana kaxeyamanunbun
 en jatuh matu nemaxunkubainxanaii.

²⁰ Shini nortekidia matukidi beaibu
 matu anua en jatuh udenxanaii,
 jadi tsua jiweabumakidi jatuh nichinkinan.
 Jabu dukun bebuaihu Ianenwan Mar Muerto anu
 en jatuh jasaxanaii.
 Jabu chipu bekin jatuh mekebidanaibu Ianenwan Mar Mediterráneo
 badi kaikidi anu
 en jatuh jasadixanaii.

En jatu jaska wa jatun yuda chapui
 pisi mayaxankanikiki,
 ea Jehován jatu betsajaida waxunkin
 tsuan jaska shinantiduma wakinan”, ikikiki.

- ²¹ “En mai pakeaan,
 jawa dateama benima chakayamadiwe,
 Jehován jatu betsajaida waxunkin
 tsuan jaska shinantiduma waxanaiwen taeadan.
- ²² Yuinaka basi anu mapuabun,
 jawa dateyamaxankanwen.
 Matun piti basi ana jukuin benexanikiki.
 Ji shadabu bimi jayaxankanikiki.
 Ji miban higo inun uva nishi jawen bimi midimajaida
 jayadiaxankanikiki.
- ²³ Man Mati Sión anu jiweabuun,
 benimadikanwen.
 Janu ui pakei taekaini inun
 janu badi pakei taekaini
 janu xaba pepatian Jehován ui yunumiswen taea
 matun Mekenika Dios Jehováwen benimakubainkanwen.
 Chanima uatian matu axunmis keska
 ana jabias keskadi matu axunkubainxanikiki.
- ²⁴ Matu jaska waiwen taexun
 matun xekiwan trigo bimi chakama man tsekaxanaii.
 Ja dikabi uva vino inun piti xeni ichapajaida man jamen axanaii”,
 itan
- ²⁵ Jehován matu ana yuiai ninkakanwen:
 “Ja baditian jau shini mesebun matun yunu chakabuwanunbun
 matu anu en jatu yunua bexun
 matu yamawainmabunan,
 ean en ana matun yunu inankin jayawaxanaii.
- ²⁶ Matubun pikin yaniwakubainkinan,
 ea matun Jehová Mekenika Dios
 man ea kenwankubainxanaii.
 En kushipa en matu unanmashinawen taea
 man enabudan, ana matun dake pae teneama man ixanaii.
- ²⁷ Ea en matun Mekenika Jehová en matubedan,
 man Israelbun janu man ana ea unan taewabainxanaii.
 Ea besti en matun Dios kayabi betsa jayama
 man unanxanaii.

Jaskawen taea man enabudan,
 ana taska matun dake pae
 man teneama ikunkainxanaii”, itan,

Jawen Yushin Kushipa Diosun jatu anu yunuxanikiaki, na janchadan

28 Jehován ana jatu yuikin:

“Na eska binukainayadan,
 ma badi jawen jenei kaya
 en Yushin Pepa yuda dasibi jiwebaunabu anu
 en jatu yunua jatu achixanikiki.
 Matun juni bakebu inun
 matun ainbu bakebu ekidi janchabaunxankananikiki.
 Mestebu inun yuxabubu namawen jaska ixanai uinxankananikiki.
 Bedunanbu inun chipashbudi nama keskawen jaska ixanai
 en Yushinen jatu uinmaxanikiki.

29 Ja dikabi ja xabatianan,

matun dayadubu junibu inun ainbuai bu anu
 en Yushin Kushipa en jatuki butedioxanaii.

30 Jaska inun, nai anua jawen e imati kushipa wakin

mai anuadi dami betsapadi en waxanaii,
 jimi jabamakin inun,
 chi wakin inun,
 nai anua basnun bai kua jawen kuin keska wakin
 en jatu uinmaxanaii.

31 Ja jaskaitian badi ana pexeama

meshui inun
 uxe ana chaxamadi jimi keska ixanikiki.

En bake kushipajaidai chaxakapa xanen ibui jua kemadiamaken
 ja janu kupiaitian xaba mese atimapa ixanikiki”, matu waya

32 januxun tsuabunda:

“En Xanen Ibu Jehová Dios kushipaki”, ikin ea dayuiaibu
 jabu besti paxakin jatun jiwea ikibi ika bixankananikiki,
 mawa kayabi anu kamadan.

Jaska Jehován jatu yubanidan,

Mati Sión inun Jerusalén anu janu piskuti jayaki.

Janua tsuabuda Jehován ma jatu katuni jiwediakubainxankananikiki,
 jawen kupiti mawa bika teneabumadan.

3

¹Ana eska Jehován matu yuiai ninkakanwen:

“Ja jaskaitianan,

jaska Judán enabun mai pakea anu inun
 Jerusalén anu bika tenei jiwekubainmisbu
 ana jaskama jatun jiwea betsajaida

en matu waxunxanaii,
jaska uinsbuma matu axunkinan.

²⁻³ En mai pakea anua enabu jatu achitan
paxka akeakekin peiwen jatu inankin
jaikaimas yuda betsa betsapabu anu jatu yunuakeakenibuki,
mai jidabi anudan.
Jatu eska wakinan, jawen jamapai unanti xau mexte númeroya
putakin unantan
enabu paxkaxun juni bakebu inun
ainbu bakebu dayadu esclavo jatu amakin
peiwen taexun jatu inanbauntan,
chipu jatuwen taexun pei bishianwen jawen uva vino bikin inun
ainbu jininipabu chutakubainibuwen taexun
ja nawa tibibu en jatu ichakawaxanaii.
Jatu jaska watan Josafat Paxku Napaku anu jatu iyuxun
Israelbu enabudan,
jabun ea jatu ichakanwanibuwen taexun
unanti watan jatu manakuxunkin en jatu kupidiaxunxanaii.

**Yuda xukuabu tibi Jehován jatu unanti watan
kupixanikiaki, na janchadan**

⁴ Maewan Tiro inun maewan Sidón inun dasibi betsabu man Filistea
mai pakea anu jiweabuun, ¿ekidi jawa shinankin man ea jawa wakatsis
ikai? ¿Eki sinatakin manakukin man ea ichakawakatsis ikai? ¿Jawa
en matu dibia man ea pakamakatsis ikai? Man jaska bikatsis ikaidan,
ja matu inanma jaska man jiwe chakawen samama jawaida en matu
kupikin memaxanaii. ⁵ Matun xenipabunan, en kenwanti Templo anua en
plata mabu inun en oro mabu yumetsubainkin buxun matun yushibubu
kenwanti jiwe anu jabun adunibuki. ⁶ Judán enabun mai pakea inun
Jerusalén anu jiweabu achitan dayadu esclavo jatu wamakin chajaida
jatu nichinkin peiwen taexun Griego nawabu matun xenipabun jatu
inanibuki. ⁷ Jakia eanan, jadia jatu peiwen inanbianibun Israelin enabu
ana ichawanun, iwanan, en jatu iwexanaii, jabun mae anu jau ana
jiwekubainunbunan. Matun xenipabu Filisteobun Israelbu jatu bika
tenemanibu keska jabiaskadi bika tenemakin en matu kupixanaii.
⁸ Januxun matu manakudiakinan, matun juni bakebu inun matun ainbu
bakebu Judíobu en jatu inanxanaii. Januxun jabundi Sabeo nawabu chai
nenumajaida jiweabu jau peiwen jatu inanxanunbun en yunuxanaii. Ea
en Jehován en jaska matu yuiaii”, itan

⁹ ana jatu yuikin:

“Nawa xukuabu tibi na en jancha jatuki chanibaunkanwen.

Detenamenikabu jau dasibi jatu pewakin keyununbunwen.
 Jatun mentsisipabu jatu kena bea
 detenamebainkatsi jau ichai benunbunwen.

- ¹⁰ Ja babubunan, shinan betsa watan
 jau eska yuinumbunwen:
 ‘Eadan, en kushipajaidaki’, ikidan,
 januxun jatun mai yapubainti betsa wakin
 jau nupe kenu chaipa midima wanunbunwen.
 Ja inun, jatun nupe xewetiya trigo mexteti betsa wakin
 jau jashi midima wadianunbunwen.
- ¹¹ Jamen man nawabu betsa jatu dapi jiwebaunabuun,
 menan jawaidabidan
 jatuki dasi ichai bedikanwen.
 Junin detename shinainsmabia betsabidan
 jau detenamedi benunbunwen.
- ¹² Januxun nawa xukuabu tibi
 Israelin enabu dapi jiwebaunabu
 Jehován jatun unanti waxanaiwen taexun
 yuda xukuabu dasibi detenamenun ika
 pewakin keyutan Josafat Paxku Napaku anu
 jau ichai benunbunwen.
- ¹³ Ja yudabu chakabujaidabu jatu detekinan,
 ma xekiwan tsekatitian kani jushian daka
 mextekin tsekamisbu keska jatu waxankanwen.
 Vino wanti ma uva bimi jushin keyua tsekan
 jaki pai pai imisbu keska wakin
 jatu maemakin keyuxankanwen.
- ¹⁴ Jehován jatun kupixanaitian ma kemaiwen taea
 januxun Unanti Wakin Katuti Paxku Napaku anu
 yudawan ichapajaida janu ichai keyuxankanikiki.
- ¹⁵⁻¹⁶ Jerusalén anu Mati Sión anuxun
 tin ikainkainai keska jawen jui Jehován jatun ninkamaya
 nai inun mai chuduin taka taka ikunkainaya
 badi inun uxe ibubis meshua dakaken
 bishi mawaida ana chaxamaken
 jakia Jehován enabu Israelbudan,
 jatun Jehová anu idui piskuxankanikiki”, itan

Judán enabun mai pakea pepa unanuma inunbadikiaki, na janchadan

- ¹⁷ Jehován ana matu yuikin:
 “Ja man ea anu jaskaitianan,
 chanima en matun Mekenika Dios Jehová

Sión en mati medibi anu en jiwea
man unanxanaii.

Ja inun, Jerusalén maewan medibi unanuma jawama ixanikiki.
Ichakanikai mebinanain detenamei nukunabuma
nawa betsabu ana betaskatidubuma ixankanikiki.

- ¹⁸ Ja xaba jaskaitianan,
ui ikaya mati anua jene jababidanmis keskai
uva vino inun ina awa chuchu ichapa
jamen ikai man jayaxanaii.
Judán enabun mai pakea anua paxku tibi
unpax midimajaida jayadixanikiki.
Ja inun, en kenwanti Templo anua chacha unpax tuetan
paxku Sitim napaku anu jabapakexanikiki,
mai dasibi pepa mecha wakinan.

- ¹⁹ Jabiatiandi Judán enabun mai pakea anu jiweabu achikin
pepubu jawa chakabuama ichapa jatu detekin
jatun jimi chakawakin jabamakubainibuwen taexun
Egipto nawabun mai pakea anu
dasibi di akin keyunibu ana maema
mashi besti pes dakaxanikiki.
Ja inun, Edom nawabun mai pakea betsa wadiakin
jau janu tsua ana jiweyamanunbun
jatu kupikin en jawa jayama wadiaxanaii.

- ²⁰⁻²¹ Eadan, en jatube manakunanxanaii.
Jatun chakabuwen taexun
jatuwen nuiama en jatu buaxunkatsi ikamaki.
Jakia Judán enabun mai pakea inun
maewan Jerusalén anu ikabudan,
jabudan, jiwepakexankanikiki.
Jamen ea Jehová jiweidan,
en Mati Sión anu
en jiwepakexanaxanaii”, iniki.